



REPUBLIKA E SHQIPËRISË

KOMISIONERI PËR MBROJTJEN NGA DISKRIMINIMI

V E N D I M

Nr. 175, Datë 21/12/2016

Komisioneri për Mbrojtjen nga Diskriminimi, mbështetur në ligjin nr. 10 221, datë 04.02.2010 “Për Mbrojtjen nga Diskriminimi”, mori në shqyrtim ankesën me nr. 81 rregj., datë 22.08.2016, nga znj. Magdalena Hysari, në të cilën pretendon se është diskriminuar për shkak të gjendjes ekonomike, nga Ministrisë së Zhvillimit Urban (në vijim MZHU).

Në përfundim të shqyrtimit të ankesës, Komisioneri për Mbrojtjen nga Diskriminimi,

K O N S T A T O I :

Në ankesën e bërë, znj. Magdalena Hysari është shprehur se ka aplikuar pranë Bashkisë Elbasan për përfitimin e bonusit të strehimit dhe me vendim nr. 67, datë 24.06.2016, të Këshillit Bashkiak Elbasan, është shpallur përfituese e këtij programi. Më pas lista e miratuar nga Këshilli Bashkiak Elbasan, është dërguar pranë Ministrisë së Zhvillimit Urban për të miratuar përfundimisht përfituesit e bonusit të strehimit. Me vendim nr. 1, datë 12.07.2016, Ministria e Zhvillimit Urban ka miratuar financimin e bonusit të strehimit për 6 nga 31 familjet e miratuara në vendimin e sipërcituar të Këshillit Bashkiak Elbasan.

Përsa më lart, ankuesja ndihet e diskriminuar për shkak të gjendjes ekonomike, pasi përfitues nga programi i bonusit të strehimit janë ato familje të komunitetit rom/egjiptian të cilat janë në gjendje ekonomike më të mirë se ajo, si dhe shton se ky program strehimi nuk vjen në ndihmë të familjeve në nevojë.

Gjendja ekonomike është një nga shkaqet për të cilat Ligji Nr. 10 221, datë 04.02.2010 "Për Mbrojtjen nga Diskriminimi", ofron mbrojtje. Në nenin 1 të tij përcaktohet se: "Ky ligj rregullon zbatimin dhe respektimin e parimit të barazisë në lidhje me gjininë, racën, ngjyrën, etninë, gjuhën, identitetin gjinor, orientimin seksual, bindjet politike, fetare ose filozofike, gjendjen ekonomike, arsimore ose shoqërore, shtatzaninë, përkatësinë prindërore, përgjegjësinë prindërore, moshën, gjendjen familjare ose martesore, gjendjen civile, vendbanimin, gjendjen shëndetësore, predispozicione gjenetike, aftësinë e kufizuar, përkatësinë në një grup të veçantë, ose me çdo shkak tjetër".

Në zbatim të parashikimeve ligjore, të përcaktuara në nenet 32, pika 2 dhe 33, të ligjit nr. 10 221, datë 04.02.2010 "Për Mbrojtjen nga Diskriminimi", Komisioneri për Mbrojtjen nga Diskriminimi, ka shqyrtuar çështjen duke ndërmarrë hapat si më poshtë:

1. Me anë të shkresës me nr. 819 prot., datë 31.08.2016, është bërë njoftimi i palëve lidhur me nisjen e procedurave të shqyrtimit të ankesës nga Komisioneri për Mbrojtjen nga Diskriminimi dhe është kërkuar nga MZHU, që të paraqesë parashtrime me shkrim mbi pretendimet e subjektit ankues.

Në përgjigje të shkresës së sipërcituar, MZHU sqaroi se: "Pas vlerësimit të kërkesës për bonus, dërguar nga Bashkia Elbasan, grupi i punës ka konstatuar se, nga 31 familjet e listuara në shtojcën A, 25 prej tyre, edhe pas financimit të bonusit nga buxheti i shtetit në masën 50 % të qirasë, nuk mbulojnë dot pjesën e mbetur të saj, me 30 % të të ardhurave të familjes. Në kushtet kur, në shkresën nr. 668-2, datë 29.06.2016, bashkia shprehet se nuk ka miratuar fonde për bonus strehimi, për vitin 2016, vlera prej 96819 lekë në muaj, për 25 familjet, rezulton e pambuluar dhe si rrjedhim këto familje nuk mund të përfitojnë nga ky program, pasi nuk arrijnë të sigurojnë një banesë në treg të lirë vetëm me financimin e MZHU deri në masën 50 % të qirasë. Në vijim sqarojmë se, bazuar në aktet ligjore në fuqi: Ligji nr. 9232, datë 13.05.2004 "Për programet sociale të sterhimit", VKM nr. 1093, datë 28.12.2015 "Për miratimin e procedurave dhe kriterëve dhe përparësive për dhënien e bonusit të strehimit", e ndryshuar, si dhe udhëzimin nr. 23, datë 30.12.2008 "Për përmbajtjen e bonusit të strehimit", vetëm 6 familje përfitojnë bonus strehimi, në shumën 175 613 lekë nga buxheti i shtetit, të miratuara me Vendim të Këshillit Bashkiak nr. 67, datë 24.06.2016. Së fundmi, me vendim nr. 1, datë 12.07.2016, MZHU ka miratuar financimin e bonusit për 6 familjet përfituese, në shumën, 175 613 lekë për vitin 2016, për 6 muajt : Korrik, Gusht, Shtator, Tetor, Nëntor dhe Dhjetor. Ndërkohë, për të gjitha familjet që nuk plotësojnë kushtet për përfitimin e bonusit, me shkresën nr. 4313, datë 29.07.2016, MZHU ka informuar bashkinë Elbasan që, sapo të krijohen kushtet për të mbuluar pjesën e mbetur të qirasë nga buxheti i bashkisë, ose nga vetë familjet (referuar akteve ligjore në fuqi), bashkia mund të ridërgojë kërkesën për bonus, për muajt në vijim, brenda datës 30 shtator."

**Mbështetur në provat e administruara nga të dy palët, rezultoi se:**

**I. Lidhur me trajtimin ndryshe dhe të pafavorshëm**

Në mbështetje të provave të grumbulluara, rezultoi që subjekti ankues, znj. *Majlinda Hyseni*, duke bërë pjesë në familjet që jetojnë me qira dhe në pamundësi për ta paguar, ka aplikuar pranë Bashkisë Elbasan, për të përfituar nga skema e bonusit të strehimit. Bashkia Elbasan me Vendim të Këshillit Bashkiak nr. 67, datë 24.06.2016, ka miratuar një listë emërore me 31 familje përfituese nga bonusi i strehimit, të cilat janë dërguar për miratim të mëtejshëm pranë MZHU-së.

Në këto kushte, grupi i punës së ngritur në MZHU, me urdhërin e Ministrit nr. 2582/8, datë 27.06.2016 “Për ngritjen e grupit të punës për shpërndarjen e fondeve nga buxheti i shtetit për bonus strehimi grante të menjëhershme”, pas shqyrtimit të kërkesave, konstatoi se për Bashkinë Elbasan, nga 31 familje të miratuara me Vendim të Këshillit Bashkiak Elbasan, nr. 67, datë 24.06.2016, vetëm 6 prej tyre përmbushnin kriteret e përfitimit të bonusit të strehimit nga buxheti i shtetit, në përputhje me aktet ligjore në fuqi.

Nga provat e administruara konstatohet se, znj. *Majlinda Hyseni* trajtohet<sup>1</sup> me ndihmë ekonomike nga ana e Bashkisë Elbasan në masën 5000 lekë në muaj.

Përsa më lart dhe duke marrë shkas nga ankesa e bërë nga znj. *Hyseni*, Komisioneri për Mbrojtjen nga Diskriminimi shqyrtoi legjislacionin në fuqi, lidhur me bonusin e strehimit dhe konstatoi se:

Ligji Nr. 9232, datë 13.05.2004 “Për Programet Sociale të Strehimit”, i ndryshuar, në nenin 5, ku përcaktohen kriteret e përzgjedhjes së përfituesve nga programet sociale, parashikon se:

*“1. Përzgjedhja e familjeve përfituese bëhet sipas një sistemi pikëzimi, me anë të të cilit vlerësohen:*

- a) Kushtet e strehimit, në bazë të të cilave përcaktohen me përparësi familjet që:*
  - i) nuk disponojnë banesë në pronësi;*
  - ii) banojnë në banesa që paraqesin rrezik shembjeje*
  - iii) banojnë në banesa të mbipopulluara, sipas përcaktimeve dhe normave në fuqi;*
  - iv) kanë mbetur ose rrezikojnë të mbeten të pastreha, si rezultat i fatkeqësive natyrore ose zbatimit të një vendimi gjyqësor.*
- b) Kushtet familjare, në bazë të të cilave përcaktohen me përparësi rastet e mëposhtme:*
  - i) familjet njëprindërore, që kanë në ngarkim fëmijë;*
  - ii) të moshuarit, që kanë mbushur moshën e pensionit dhe që nuk përzgjidhen për t'u strehuar në institucionet publike të përkujdesjes shoqërore;*
  - iii) familjet me më shumë se katër fëmijë;*

<sup>1</sup> Mbështetur në kërkesën datë 16.11.2015, drejtuar Bashkisë Elbasan, znj. *Majlinda Hyseni* përfiton ndihmë ekonomike

- iv) çiftet e reja me moshë totale deri në 60 vjeç.
- c) Kushtet sociale, në bazë të të cilave përcaktohen me përparësi rastet e mëposhtme:
  - i) personat me aftësi të kufizuara, në përputhje me përcaktimet e bëra me vendim të Këshillit të Ministrave për këto kategori;
  - ii) personat me statusin e jetimit, që nga çasti i daljes nga qendrat e përkujdesjes shoqërore e deri në moshën 30 vjeç;
  - iii) emigranti i rikthyer, punëtor emigrant;
  - iv) familjet e policëve të rënë në detyrë;
  - v) viktimat e dhunës në familje.
- ç) Gjendja ekonomike, në bazë të së cilës përcaktohen familjet sipas grupeve të të ardhurave.
  2. Sistemi i pikëzimit miratohet me vendim të këshillit të njësisë së qeverisjes vendore për çdo program që zbatohet në një njësi të qeverisjes vendore dhe bazohet në kriteret e përcaktuara në pikën 1 të këtij neni.
  3. Kur programi zbatohet me financim, të plotë ose të pjesshëm, të Buxhetit të Shtetit, ministria, që mbulon çështjet e strehimit, në raport me masën e financimit dhe në bashkërendim dhe në marrëveshje me kryetarin e njësisë së qeverisjes vendore përkatëse, mund të kushtëzojë një sistem pikëzimi, që favorizon kategori, të cilat kanë përparësi në politikat kombëtare, si personat me statusin e jetimit, që nga çasti i daljes nga qendrat e përkujdesjes shoqërore deri në moshën 30 vjeç, personat me aftësi të kufizuara, punëtorët emigrantë, emigrantët e rikthyer, familjet e policëve të rënë në detyrë. Marrëveshja, përveç sistemit të pikëzimit, për kategoritë e sipërpërmendura, përfshin edhe angazhimin për mbulimin e shpenzimeve, sipas pikës 2 të nenit 24 të këtij ligji.
  4. Në objektet e reja që ndërtohen, organet e qeverisjes vendore, në përzgjedhjen e përfituesve marrin parasysh si kriter edhe përzjerjen e grupeve të ndryshme sociale, me qëllim që të shmanget veçimi social.”

Ndërsa neni 6, i ligjit të 9232/2004, i ndryshuar, përcakton se: “1. Jo më pak se 80 për qind e familjeve që trajtohen në banesa sociale me qira duhet të kenë të ardhura deri 100 për qind të të ardhurave mesatare familjare të njësisë së qeverisjes vendore përkatëse.

2. Pjesa tjetër mund të përzgjidhet brenda intervalit 100 - 120 për qind të nivelit të të ardhurave mesatare. Kjo kategori paguan një qira më të lartë se kategoritë e tjera, por jo më shumë se 30 për qind të të ardhurave mujore.

3. Për vitin e parë të zbatimit dhe në mungesë të të dhënave, sipas pikës 2 të këtij neni, merret për bazë niveli i të ardhurave mesatare të disponueshme dhe të indeksuara me ndryshimin e nivelit të pagave.”

Në nenin 24, të ligjit të sipërcituar parashikohet se: “1. Kur qiraja e banesës sociale zë më shumë se 25 për qind të të ardhurave neto të familjes, sipas shkronjës "a" të nenit 5 të këtij ligji, kjo e fundit përfiton subvencionim të qirasë. Shuma e subvencionimit llogaritet e barabartë me

diferencën ndërmjet qirasë së synuar dhe asaj të përballueshme. Masa e subvencionimit miratohet me vendim të këshillit të njësisë së qeverisjes vendore.

2. Përparësi në subvencionimin e qirasë ose përfitimin e bonusit të strehimit kanë kategoritë e mëposhtme: a) personat me statusin e jetimit; b) personat me aftësi të kufizuara, në përputhje me përcaktimet e bëra me vendim të Këshillit të Ministrave për këto kategori; c) familjet e policëve të rënë në detyrë. ç) emigrantët e rikthyer; d) punëtori emigrant; dh) familjet e komunitetit rom; e) punonjësit e Policisë së Shtetit.”

Përsa më lart, programet sociale strehimi janë “programe, të cilat shërbejnë për strehimin e familjeve dhe të individëve, që nuk janë në gjendje ekonomike e sociale të përballojnë ofertën e tregut të lirë të banesave. Në të përcaktohen tre programe sociale strehimi: banesat sociale me qira, banesat me kosto të ulët dhe programi i pajisjes së truallit me infrastrukturë. Përfituesit e programeve sociale të strehimit duhet të përmbushin njërin prej kritereve të mëposhtme: nuk kanë në pronësi një banesë; zotërojnë sipërfaqe banimi nën normat e strehimit; ose kanë mbetur të pastrehë, si rezultat i fatkeqësive natyrore (Ligji nr. 9232, neni 4). Përzgjedhja e përfituesve mbështetet tek kushtet e tyre të jetesës si edhe tek rrethanat e tyre shoqërore dhe ekonomike. Përparësi u jepet 15 grupeve, përfshirë familjet me një prind të vetëm, familjet e mëdha, të moshuarit, personat me aftësi të kufizuara, çiftet e reja, familjet që kanë ndryshuar vendqëndrim, jetimët, emigrantët e rikthyer, punëtorët migrues, azilkërkuesit, oficerët e rënë në detyrë, viktimat e dhunës në familje, familjet rome, familjet egjiptiane dhe përfituesit e ndihmës ekonomike.

Në të njëjtën frymë qëndron edhe VKM-ja Nr. 1093, datë 28.12.2015 “Për miratimin e procedurave, kritereve dhe përparësive për dhënien e bonusit të strehimit”, në të cilën i jepet përparësi të njëjtës kategori të familjeve përfituese.

Gjithashtu, kjo VKM në pikën 8 të saj përcakton se: “Ministria që mbulon çështjet e strehimit financon bonusin e strehimit, të barabartë me diferencën ndërmjet qirasë minimale në tregun e lirë, bonusit të financuar nga njësia e qeverisjes vendore dhe qirasë së përballueshme nga familja, në rastet kur diferenca ndërmjet qirasë së tregut dhe vlerës së bonusit kalon 30 për qind të të ardhurave të familjes.”

Përfundimisht për vitin 2016, Këshilli i Ministrave me Vendim nr. 466, datë 22.06.2015 “Për një shtesë në vendimin nr. 1093, datë 28.12.2015, të Këshillit të Ministrave “Për miratimin e procedurave kritereve dhe përparësive për dhënien e bonusit të strehimit”, ka përcaktuar se: “...në rastet kur njësitë e qeverisjes vendore nuk kanë fonde të miratuara në buxhetin e tyre për bonus strehimi, buxheti i shtetit do të përballojë deri në 50 % të qirasë, ndërkohë pjesën e mbetur e përballon qytetari që përfiton bonusin e strehimit. Bashkitë paraqesin kërkesat për bonus strehimi brenda datës 30 shtator 2016.”

Pavarësisht përparësive që u janë dhënë familjeve të kategorive të ndryshme në nevojë, politikat e hatuara nga qeveria dhe shihet përsëri që familjet me të ardhura më pak se 50 % e qirasë mujore nuk mund të përfitojnë nga programi i bonusit të qirasë.

## II. Lidhur me trajtimin në mënyrë të diferencuar për shkakun e pretenduar nga ankuesja, Komisioneri gjykon se:

Përsa i përket gjendjes ekonomike të znj. *ajmua Hysa*, bazuar në dokumentacionin e depozituar pranë Komisionerit për Mbrojtjen nga Diskriminimi, rezulton që familja e saj përbëhet nga 2 (dy) persona dhe trajtohet me pagesë të ndihmës ekonomike nga ana e Bashkisë Elbasan në masën 5000 lekë.

Referuar legjislacionit në fuqi, përbërjes familjare dhe të ardhurave mujore që ka, nuk arrin që të mbulojë 50 % të qirasë mujore sipas të programit të bonusit të qirasë.

Në përfundim, nisur nga shqyrtimi i këtyre fakteve, Komisioneri gjykon se, familjet që në bazë të të ardhurave mujore arrijnë të sigurojnë 30-50 % të qirasë sipas programit të bonusit të qirasë, mund të jenë përfituese të këtij programi social. Pra, familjet që trajtohen me ndihmë ekonomike, janë përfundimisht të përjashtuara nga ky program social, për shkak të nivelit të ulët të të ardhurave mujore. Në këto kushte, këto familje me këtë nivel të të ardhurash nuk arrin asnjëherë të përfitojë nga programet sociale të strehimit

### II- A ka qenë ky trajtim objektiv dhe arsyeshëm?

**Çështjet e diskriminimit kërkojnë që të vërtetohet nëse ekziston një përlligje e arsyeshme për trajtimin ndryshe të evidentuar.**

Ligji “Për mbrojtjen nga diskriminimi”, në nenin 3, pika 3, parashikon se: “ *Diskriminimi i tërthortë*” është ajo formë diskriminimi që ndodh kur një dispozitë, kriter apo praktikë, e paanshme në dukje, do ta vinte një person ose grup personash në kushte jo të favorshme, në lidhje me shkaqet e parashtruara në nenin 1 të këtij ligji, në raport me një tjetër person ose grup personash, si dhe kur ajo masë, kriter a praktikë, nuk justifikohet objektivisht nga një synim i ligjshëm, ose kur mjetet e arritjes së këtij synimi, ose nuk janë të përshtatshme, ose nuk janë të domosdoshme dhe në përpjesëtim të drejtë me gjendjen që e ka shkaktuar atë”.

Në çështjen Thlimmenos kundër Greqisë<sup>2</sup>, Gjykata Evropiane e të Drejtave të Njeriut, ka mbajtur qëndrimin se: “.....e drejta për të mos u diskriminuar në gëzimin e të drejtave të garantuara nga Konventa për Mbrojtjen e të Drejtave të Njeriut është shkelur gjithashtu kur shteti pa një justifikim

<sup>2</sup> Thlimmenos kundër Greqisë, Kërkesa nr. 34369/97, vendimi me datë 06.04.2000



*objektiv dhe të arsyeshëm dështon për të trajtuar personat ndryshe kur situatat e të cilëve janë dukshëm të ndryshme”<sup>3</sup>.*

Programi i banesave sociale me qira ka më shumë gjasa të ketë në fokus familjet me të ardhura të ulëta. Por megjithatë, njerëzit që jetojnë afër ose nën kufirin e varfërisë nuk mund ta përballojnë këtë program. Nga informacioni i administruar gjatë procedurave hetimore, u konstatua se në legjislacionin shqiptar, nuk ekzistonte një program strehimi nëpërmjet së cilit familjet në nevojë dhe të pastreha, të përfitojnë banesë sociale apo bonus qiraje, nëse nuk kanë të ardhura. Pra, për familjet në nevojë të cilat jetojnë afër ose nën kufirin e varfërisë, nuk është menduar asnjë zgjidhje për strehimin e tyre.

Në këtë kontekst, referuar nenit 7, pika 1<sup>4</sup>, të ligjit nr. 10 221, datë 04.02.2010 “Për mbrojtjen nga diskriminimi”, nga analizimi në tërësi i fakteve të sipërpërmendura, Komisioneri gjykon se, legjislacioni i sipërcituar mbi programet sociale të strehimit, i paanshëm në dukje, ka sjellë vendosjen në kushte të disfavorshme të znj. *[Emri i personës]* si përfituese e ndihmës ekonomike, në raport me familjarë të cilët kanë mundësi ekonomike për të përfituar nga programi social i bonusit të qirasë. Në këto kushte, znj. *[Emri i personës]* dhe kategoria e familjeve që trajtohen me ndihmë ekonomike, janë ekspozuar ndaj një trajtimi të padrejtë dhe jo të barabartë duke u vënë në pozita diskriminuese për shkak të gjendjes ekonomike të tyre.

Në nenin 1<sup>5</sup> të ligjit nr. 10 221, datë 04.02.2010 “Për mbrojtjen nga diskriminimi” përcaktohet një listë joshtruese shkaqesh diskriminimi, ku “*gjendja ekonomike*” është një nga shkaqet e parashikuara.

Përsa më lart dhe në analizë të legjislacionit të sipërcituar, konstatohet se MZHU dhe Bashkia Elbasan, mbështetur në legjislacionin e sipërcituar, kanë përfshirë në programin e bonusit të qirasë, të gjitha familjet të cilat kanë plotësuar kriteret e për përfitimin nga ky program strehimi. Pra, familjet që kanë aplikuar për të përfituar nga ky program strehimi, janë trajtuar në të njëjtën mënyrë dhe mbështetur në kriteret e përcaktuara në legjislacion.

<sup>3</sup> Konventa Evropiane e të Drejtave të Njeriut (Ratifikuar nga Republika e Shqipërisë me Ligjin nr.8137, datë 31.07.1996, hyrë në fuqi në datë 02.08.1996) dhe jurisprudenca e GJEDNJ janë të detyrueshme për tu zbatuar bazuar në nenin 116 të Kushtetutës së Republikës së Shqipërisë

<sup>4</sup> Në nenin 7, pika 1, të ligjit nr.10 221, datë 04.02.2010 “Për mbrojtjen nga diskriminimi”, parashikohet: “Çdo veprim ose mosveprim i autoriteteve publike ose i personave fizikë a juridikë që marrin pjesë në jetën dhe sektorët publikë ose privatë, që krijojnë baza për mohimin e barazisë ndaj një personi apo grupi personash, ose që i ekspozon ata ndaj një trajtimi të padrejtë dhe jo të barabartë, kur ata ndodhen në rrethana të njëjta ose të ngjashme, në krahasim me persona të tjerë ose grupe të tjera personash, përbën diskriminim”.

<sup>5</sup> Në nenin 1 të ligjit nr.10 221, datë 04.02.2010 “Për mbrojtjen nga diskriminimi”, parashikohet: “Ky ligj rregullon zbatimin dhe respektimin e parimit të barazisë në lidhje me gjininë, racën, ngjyrën, etninë, gjuhën, identitetin gjinor, orientimin seksual, bindjet politike, fetare ose filozofike, gjendjen ekonomike, arsimore ose shoqërore, shtatzaninë, përkatësinë prindërore, përgjegjësinë prindërore, moshën, gjendjen familjare ose martesore, gjendjen civile, vendbanimin, gjendjen shëndetësore, predispozicione gjenetike, aftësinë e kufizuar, përkatësinë në një grup të veçantë, ose me çdo shkak tjetër”.

Në përfundim, evidentohet se legjislacioni në fuqi për përfitimin nga programi i bonusit të qerasë nuk vë në të njëjtat kushte të gjitha familjet në nevojë, duke diskriminuar kështu në mënyrë të drejtpërdrejtë<sup>6</sup> familjet në nevojë dhe duke i privuar atyre të drejtën për të përfituar nga programi i strehimit social me qira.

### PËR KËTO ARSYE :

Mbështetur në nenet 3, 4, 7, pika 1, nenin 20, nenin 21, pika 1, nenin 32, pika 1, gërma a), si dhe nenin 33, pikat 1, 3, 5, 7 të Ligjit nr. 10 221, datë 04.02.2010 “Për mbrojtjen nga diskriminimi”, Komisioneri për Mbrojtjen nga Diskriminimi,

### V E N D O S I :

1. Konstatimin e diskriminimit të drejtpërdrejtë për shkak të gjendjes ekonomike, nga ana e Ligjit Nr. 9232, datë 13.05.2004 “Për Programet Sociale të Strehimit”, i ndryshuar, VKM-së Nr. 1093, datë 28.12.2015 “Për miratimin e procedurave, kritereve dhe përparësive për dhënien e bonusit të strehimit”, si dhe VKM-së Nr. 466, datë 22.06.2015 “Për një shtesë në vendimin nr. 1093, datë 28.12.2015, të Këshillit të Ministrave “Për miratimin e procedurave kritereve dhe përparësive për dhënien e bonusit të strehimit”, të shtetasve që i përkasin familjeve në nevojë.
2. Duke qënë se Draft-Ligji “Për Programet Sociale të Strehimit” (për të cilin ka dhënë rekomandimet edhe Komisioneri për Mbrojtjen nga Diskriminimi) është ende në proces konsultimi, Komisioneri për Mbrojtjen nga Diskriminimi rekomandon miratimin e tij duke ruajtur këto ndryshime, në programet e strehimit me qira të shtetasve që i përkasin familjeve në nevojë.
3. Bazuar në nenin 33 pika 11, të ligjit “Për Mbrojtjen nga Diskriminimi”, Ministria e Zhvillimit Urban, detyrohet që brenda 30 (tridhjetë) ditëve të njoftojë Komisionerin, lidhur me veprimet e ndërmarra për zbatimin e këtij vendimi.
4. Në referim të nenit 33, pika 11 e ligjit 10221/2010 “Për Mbrojtjen nga Diskriminimi”, moszbatimi i këtij vendimi sjell si pasojë ndëshkimin me gjobë sipas parashikimeve të bëra në pikën 13 të po këtij neni.

<sup>6</sup> Në nenin 3, pika 2 të ligjit nr. 10 221/2010 “Për mbrojtjen nga diskriminimi”, parashikohet se: “*“Diskriminim i drejtpërdrejtë” është ajo formë diskriminimi që ndodh kur një person apo grup personash trajtohen në mënyrë më pak të favorshme sesa një person tjetër, apo një grup tjetër personash në një situatë të njëjtë a të ngjashme, bazuar në cilindo shkak të përmendur në nenin 1 të këtij ligji*”.

5. Kundër këtij vendimi lejohet ankim në Gjykatën Administrative të Shkallës së Parë Tiranë, brenda afateve ligjore.

